

Av salût, cara gent, buna sira:  
son cuntent 'd vighvi chi 'nche sta vota  
per sta nostra Cumedia Divota  
che ogni ani am mubilita tûc.

Ant in ani 'j n'è tonti 'd nutissij,  
j'è d'la roba 'n poc vegia e 'n poc nova,  
j uma avì la sicen-na e la piova  
e u jè stac d'el brût temp e du su.

Ma speruma ch'el fioca pû a Ruma  
che se a Ruma uj ven sù 'n centim 'd fioca,  
tût le ferm, j von tûc bej an oca;  
chisà mai s'el fiuchèis tont me chi.

L'an pasà l'era mort Munsieur Gagnor  
e 'nt el cor j'avu tûc d'la tristêsa,  
ma adès j'uma 'n poc 'd cuntentêsa:  
finalment l'è rivà 'l Vêscuv nov;

Salûtûma u nov Vêscuv 'd Lisondria;  
e 'nche tûc 'sti bon frà, salûtuma,  
ch'jon pasiensa e j son brav, quond ca mnuma  
chi da lur a fej perdi tu temp;

E u j'è 'n mûg ad fanciòt, sev, ch'j venu;  
dai pi giuvu ai pi veg: i frequentu,  
is divertu, i giogu e i sentu  
i cunsili e i parer d'isti frà.

L'è l'ambient che coi frà l'è magnific:  
tût l'è ben urdinà csi lè 'n drenta,  
e la Cesa, chi vsèn, l'è lisenta  
e 'rnuvaja ch'la smeja 'n bumbòn.

Trei meis fa a l'è mort in brav Padre  
misiunari e 'ncasei provinciale:  
u so nom l'era Padre Natale  
e l'ha fac semp d'el ben da pertût.

L'uma avì tonta temp chi, a Lisondria,  
semp presènt ant i post necesari,  
con sti fiòj l'era quasi in sgònd pari,  
e u j'ha semp cunsiglià per el mej.

L'è con noi, chi, sta sira, u so spirit,  
e a parl quasi con lû, tal e quale:  
benedicite, Padre Natale,  
e ch'el prega, da u ciel, per tûc noi.

Tûc i Vêscuv e 'l Papa, a Ruma  
riûnì, j'on parlà 'd robì sonti,  
j'on dicìs tontì robì impurtontì  
per la Cesa e per tûc i Cristiòn.

A j'amnìvu dal part 'd tût el globo  
perchè u jè tût el mond da difendi:  
j'on spianà tontì e tontì facendi  
e cuc cosa cmensùma a sciarè.

Per din jên-na: la gent, a la festa,  
la va fin pû 'ulantèra a la Mèsa;  
perchè us parla italiòn, l'è na blèsa,  
e us partecipa fina pû ben.

U jè mort, gram umòn, Winston Churchill,  
ch' l'ha salvà u so país, l'Inghiltera,  
quond che Hitler el fava la guera  
e u smiava el padròn 'd tût el mond.

Anche Cric a l'è mort: cul artista  
che con Croc l'ha fac fè tont 'd cul reji  
ant el mond, senza cul purchereji  
ch' j masteju j'artista d'ancò;

Perchè dèss, ant el mond du spetacul,  
j'è d'la gent ch'j son mat, omi e doni:  
j rispètu gnonc pû 'l matrimoni,  
la famija, i custûm, la muràl.

I sa spusu pensonda a u divorsi:  
per sulè lur is peju el ma 'd ponsa  
ad marièsi an America, an Fronsà  
acsè pò a divursiè j son sà pront.

Bej artista ch'j son, tûc ansema,  
ant la vîta 'd murâl j n'on meja,  
la cuscienza 'j son gnonc se ch'la seja:  
cmè ch'j vivu, csè j fon an su "set".

A Parigi, De Gaulle, testa quadra,  
l'era propi sicûr d'la vîtoria,  
e po 'nveci, con tût la so boria,  
l'ha nent pers propi propi pr'in fil.

A l'è in omi coi rat ant la testa,  
l'è 'n sùcòn a l'è gnûc ant i afâri:  
cmè Bastion el fa semp el cuntrari  
perchè lû l'è cunvint d'esi fûrb.

L'ha rûsiâ col nasiòn 'd tût el globo,  
dès che tûc i son contra la Fronsâ  
u sa pû 'ndo serchè 'd l'aleonsa  
e 'l vo 'ndè fina an URSS, cul ursòn.

L'è cunvint ad dirigi la dansa,  
ma la Rûsia l'è in urs con la sgroja:  
il son tûc che 'd balè n'ha net voja,  
a l'è j ater ch'la vo fè balè.

Quond ch' l'ha dic ca l'auriva andè 'n Russia,  
j'on ciamà se ch' l'auriva 'ndè fè;  
a l'ha dic che "Je vais à la paix":  
a l'è fina in lapòn, ultra tût.

Tûc i populi j'amiru u nost Papa  
per i sfors che lû 'l fa, 'nche sta vota,  
per serchè 'd fè finì ogni lota,  
per cui vena la pas da pertût.

Ant el mond us vigh ben che i governi  
i son tûc semper pront a sbranèsi,  
basta 'n mache cui seja 'd l'interesi  
per ch'us uarda 'nt la faccia pi 'nzên.

E l'è 'nveci da doi mila ani  
che 'n mesagi el pruvèn dant na grota,  
in mesagi ch'l'è tont 'me na nota  
ca la cmensa 'l pi bel d'i cuncert.

L'è in invito a 'uris ben tûc ansema,  
cui trionfa la pas, la giûstisia,  
cumpurtès senza odi o malisia,  
uguaglionsa per tûc ant el mond.

L'è questìon 'd voluntà, cari siuri,  
e 'd mustrè d'aurei ben al Mesia  
per piè part a la gron sinfunia  
an con j'ongel 'd la noc ad Nadal.

